



芝園別集

奏議卷之一

巡撫謝恩疏

奏為謝

恩事臣先任河南布政使司左布政使

於嘉靖二十四年九月十一日准吏部咨該本部

題奉

聖旨張時徹陞都察院右副都御史巡撫四川等

處地方寫勅與他欽此欽遵移咨到臣嘉靖二十

五年正月二十六日行至該省所屬巫山縣謹望

闕叩頭謝恩本年二月二十四日至省准前任巡

撫四川右副都御史王 將原領 符驗關防吏



卷咨臣接管行事外伏念臣學不通方器非適用
幸遘雲龍之會濫收樸樛之材徼寵簪紳雖有志
於表樹待罪藩服曾莫効乎消埃乃者過蒙

陛下錫以鈞陶之恩授茲風憲之寄斤德匪稱愧
補報之未能矢心自圖期綏柔之是力惟遠播中
興之治庶少紓西顧之憂伏願 陛下德屆遐荒
風行絕徼河清海宴納萬國於康寧日升月恒普
八方之臨照則天下幸甚臣愚幸甚臣無任感激
陳謝之至

番情疏

題爲緊急番情乞調兵置將刻期征剿以安邊鎮
事據四川按察司整飭安綿利保兵備僉事陳乙
呈准原任遊擊曹克新手本開稱嘉靖二十五年
正月二十四日高壩番隘割營西番約二千有餘
躡水過河分股四下徑來攻石泉縣本職督率守
備耿垚指揮郭儀楊威等百戶舍旗杜文昌龔藻
劉珩等出城迎敵隨有本職先發青崗堡官軍李
朝陽等二百名并叅將杜欽指揮吳繼祖亦發壩
底堡村勇五十名到來三軍夾攻卯時鏖戰至酉
時官軍奮不顧身百戶劉珩身先用槍殺傷二番

隨被番衆將本官當胸射一藥箭頭腦砍訖二刀
桃坪村勇任性曉持槍奮殺七番被番亂刀削去
鼻脣百口龔藻亦奮勇當先殺傷一番被番亦將
本官頭手砍訖二刀各扶回縣調治次日百戶劉
珩因傷身死又據該道呈二月十一日番蠻在於
曲山壩坪出沒為害當有報効立功指揮曹思率
領所部軍勇士兵家丁前去截殺與賊交鋒數陣
射傷番賊不知其數只因矢盡別無利器被賊四
股攻圍曹思陣亡又據松潘東路遊擊張和呈
二月初九日哨見番蠻不知其數一股相離七

十里地名水沙壩劄營一股由鐮板嶺透路要來
攻打本堡欽等率領旗軍於初十日巳時前到該
堡會合貼守旗軍與番迎敵就陣斬獲首級四顆
被番搶去至十一日辰時前番三百餘衆復來誘
敵各軍出戰間遍山伏番奔出前後衝圍番多軍
少不能抵敵只得固守本月十三日又准統兵都
指揮陳崇二次飛報大勢番蠻在平安崖燒劫人
財逼近茅堆堡二里劄營速兵策應本職那發旗
軍何貴昌等前去應援節次據報聲東擊西變詐
莫測番勢日熾地方險遠誠恐顧此失彼實難週

應又據代行叅將事原任四川都司署都指揮僉事魯元忠呈稱據報羅打墮財主等寨番蠻聚眾前來攻圍茂州等處地方又據報稱賴子力兒等寨番蠻聚眾在於對堡河東劄下不知何處為害乞發兵應援又據龍州宣撫司申開白草等寨番蠻要來攻圍山茅大印徐塘就往龍州葉棠鐵龍正頭坪東西二溪謝村等處為害賜發將官軍兵早為防備又據疊茂遊擊將軍署都指揮僉事李元實呈稱本月十一日有高黃脊魚二寨番牌秀兒等令番人和尚兒子癩子兒子來堡報說有青

片板舍番蠻說是壩底等堡將他為白的蠻子殺了幾箇他們大大小小在寨殺牛捨心聚齊要來實大關新堡子馬路等堡報讐大做一場等語理合稟報施行又據分守四川松潘等處地方副總兵都指揮僉事高崗鳳呈稱今年正月初十日因奔走積勞兼且不服水土前疾舉發中風三日不省人事見今傳流右手右足風濕不能動履已成痼疾不堪承乏見今地方多虞恐致悞事乞委相應官員前來暫代行事等因各到臣卷查先據安綿兵備道僉事陳乙節次呈稱大勢番蠻攻圍城

堡劫燬人財房屋攻陷奠酒平番關堡虜去守堡
指揮丘仁并隨住家小及敵殺百戶耿爵并旗軍
耿大等與民快鄉勇先後不下二百餘名并劫虜
在堡商賈妻小糧米頭畜不記其數乞發兵防剿
等因又據松潘兵備副使繆宗周呈稱松潘副總
兵高崗鳳患病沉重要出小河等處就醫調治俱
經前任巡撫四川都御史王 題請去後未奉
明旨今據前因除一面調發兵衆責令各叅遊都
司等官統領分布要害協力防禦相機征剿毋致
滋蔓一面出示曉諭番衆自知悔禍擒斬首惡

舊築立關堡認守地方准與奏 請開
訖臣隨會同巡按四川監察御史朱徵議照四川
地方原係開通山谷深入不毛番戎錯居負固弗
率種類既難盡殄而恩信莫可招來故設兵戍以
控制之馴熟番以聯屬之時賞犒以羈縻之要皆
為不得已之計耳若防範加嚴綏柔有道則可以
期旦夕之安一或失馭則狼噬豨突肆行剽掠此
其常也先年番衆一支流入石泉縣所管白土等
鄉屯聚既久生齒日繁遂逐其居民而據其土地
號為白草番蠻後至不可翦蕩乃始扼要害而守

之即今莫酒平番關堡是也近因遊擊周庚作威
妄殺挑怨啓釁而亡命奸人為之鄉導四出搶劫
荼毒生靈初以指揮丘仁玩寇不戒關堡既沒而
俘囚是甘繼而指揮曹思輕率寡謀貪功深入而
首領不保遂致賊勢猖獗擁衆突入官軍與之對
敵雖時有斬獲而失利亦不少矣臣即令圖上形
勢詢之長老乃知前項關堡固番寇之咽喉也今
我既失險賊乃得逞羊腸鳥道縱橫出沒在彼如
建瓴之易而在我若升天之艱雖有輕兵悍卒莫
敢先登欲以靖患不亦難乎臣因熟計之以為夫

兵不征則關堡不復關堡不復則寇患未彌乃徒
屯聚將士朝夕戒嚴險阻隔絕不相應援賊乃乍
聚而倏散東奔而西突益長犯順之心莫遏跳梁
之勢使兵衆疲于久駐而錢糧匱於轉輸非計之
得者也即欲曲為撫處而彼乃自知罪在不赦罔
有悛心烏合鷓鴣張日加滋蔓所在告急變且不測
臣愚以為不大創者不久懲不一勞者不永逸况
患在剝牀事非得已者哉伏望 陛下赫發神威
肆行 天討容臣等調發精兵三萬以上督令原
委領兵官如原任遊擊署都指揮僉事曹克新松

潘南路右叅將署都指揮僉事杜欽原任行都司
署都指揮僉事龔銳松潘東路遊擊署都指揮僉
事張和行都司署都指揮僉事李繼武原任都指
揮僉事丁勇原任四川都司署都指揮僉事魯元
忠守備壩底指揮使耿垚松潘衛指揮使史諭成
都前衛指揮僉事吳繼祖等分部管領其餘諳曉
戰陣堪以驅策者不分見任閒住等官俱聽臣等
隨宜調遣仍令布按二司各道官監督及支放錢
糧紀驗功次乃分布要害畫定方略刻為期日諸
道齊發務在直搗巢穴盡殲醜類共成犄角之功
以收蕩平之績如漢上官舍有不用命者容臣等
一面拏問據實招叅兩司各道及諸將官有違節
制者從重劾治庶幾軍威克振而將士知奮戎夷
竦疊而禍患可彌矣然興師固貴乎有名而制勝
莫先於用將蓋三軍之衆實寄命焉誠不可不慎
者也書稱黃髮易貴長子自古然矣今見任副總
兵高崗鳳謀略未聞衰慵已甚即今地方有警適
以患病引身誠宜亟處以慰人心臣等訪得原任
總兵何卿智勇夙成精忠自誓士卒與同手甘苦
矢石親冒乎艱危阨塞靡所不經鼓舞無時或怠

建防樹畫既有以銷患於平時應變出奇又足以
禦侮於倉卒是以戎夷畏之如神明而編氓戴之
為父母誠全蜀所恃以為安者也即今一二可使
之將則卿之麾下也一二善戰之卒則卿之素練
也使卿用之則一可以當十委之他人則一不足
以與一矣嘗聞事有緩急而材有短長故西北可
以無卿而全蜀非卿不可又况越客不可以御車
而燕人不可以航海何者狃於習也故卿之於蜀
可以當數萬之兵甲轉而之他則亦猶夫人耳即
使用卿於西北豈能如其在蜀哉伏望 陛下念
遠服之群生為長城之重計將高崗鳳放回原籍
以免憤事之愆准令何卿復還本鎮星馳前來統
領兵將則先聲警服既足以寒西戎之膽而方略
指麾自可以折衝於尊俎之前邊鄙獲寧居民安
堵 陛下永無西顧之憂矣使卿開府建節得終
其身則卿所策勵之偏裨皆可以為他日之將領
卿所訓練之士卒皆可以為他日之干城其為全
蜀之保障豈特宵旦之計而已哉此安危係於一
方責任關於臣等故敢冒昧以聞惟 陛下財察
焉如使各番知大兵四集無所逃命畏 朝廷之

威靈聽官司之撫諭去逆効順送還虜去人口擒斬首惡投獻情愿築立關堡認守地方容臣等奏請俯加矜宥以開向化之路則不煩兵革而坐收平定之功此又臣等之至願也均乞 勅下該部覆議下臣等施行則地方不勝幸甚臣等不勝幸甚為此會本謹題請 旨

擒獲逆番首惡疏

題為征剿逆番事據四川布按二司守巡兵備等道左叅政李義壯右叅政宋宜僉事張朝聘兵備僉事陳乙呈先該臣案驗准兵部咨通行各道并

行外續又該臣機宜密帖各練兵聽候調度隨准松潘南路右叅將杜欽手本據上官坤兒卜於本年五月二十九日報稱有白草西番牌頭李保保祐堵等率領番衆數多不知向往乞嚴加隄備各道隨行各營將官整擷兵馬遇警策應及會叅將杜欽督發官軍遠近按伏相機截殺隨於六月初三日四更時分據各道差去哨風熟番西保等報稱西番牌頭李保等約有三五百人穿戴盔甲暗伏枇杷嶺下要來為害有小夥子余六隔又來

詐說要將我軍掣退方纔回寨約衆投降督軍僉事張朝聘見得情狀可疑佯許掣兵隨差人陰尾其後果見暗伏番衆飛報前來就同叅將杜欽督發前項官軍前去迎敵各番望見我軍鼓噪吶喊前來衝陣鏖戰數四被番將我軍李廷用姜再十三支伏友各射傷弩箭不等內有原虜魏氏欲乘間脫走又被李保截訖四刀當有指揮吳繼祖家丁吳德并土舍何効忠舍人杜芳撫番總旗姜弘遠等奮勇衝鋒伏兵四集當將牌頭王保柘皆二人殺死并原謀倡亂攻陷平番堡首惡李保生擒各番奔走被我官軍奮勇追趕斬獲散番首級一卜九顆奪獲被虜男婦何印張么兒李萬慶楊氏王氏何氏并被傷魏氏等七名口并馬五匹牛七隻羸二頭弓弩箭槍哈喇刀七十餘件其餘各番奔入林箐天晚不能窮追掣兵回營為照前項番牌李保等違背國恩攻陷城堡殺虜官軍先於正德十六年出劫龍州沙坪徐塘等堡又於嘉靖二十三年出劫龍州萬壩何仁山等處今於嘉靖二十四年十一月內詐令六六子即馬從林木樹前赴平番堡買賣以致官軍不備攻陷關堡今被

我軍奮勇追殺致有前捷此皆仰仗本院號令嚴明機宜素定并三司籌畫所致非各道所能與也除將李保并斬獲首級解赴軍門委官紀驗牛馬羸子夷器行令指揮吳繼祖收領被虜人口查照給主外理合會呈施行等因又據整飭威茂兵備副使胡鳳呈稱行委指揮李嵩等募調民兵楊錦等在社壇村圍捉楊伏受到官供出伏受劫堡持槍下手殺死百戶耿爵又稱馮么兒同攻關堡殺人放火陽為熟番透漏軍情當差通事劉朝晉帶領民兵王廷漢等前往桃坪密捕馮么兒解送來又訪兇首兒伯什領番三十餘人在於神溪河出沒要得糾集白若羅打鼓等寨為黨以拒大兵本道會同代行叅將署都指揮僉事魯元忠隨發兵協捕六月初十日酉時各兵四合將兒伯什生擒得獲追斬散番首級二顆其餘遁入深箐去訖具由差人管解到臣卷查先節據安綿兵備道呈報白草番蠻聚眾出沒燒劫關堡殺虜官軍等情備出告示招撫一面行威茂兵備副使胡鳳松潘兵備副使繆宗周約束各邊番寨各要自保身寨毋聽糾合為寇及通行加謹隄備相機策應一面

行委原任遊擊曹克新松潘南路右叅將杜欽東
路遊擊張和署都指揮僉事魯元忠原任署都指
揮僉事丁勇等分路防禦兵備僉事陳乙分守川
北道叅政宋宜分巡川西道僉事張朝聘各監督
分守川西道叅政李義壯督理糧餉及節將軍中
事宜行令整飭并議征剿復信地謹關堡嚴策應
精間諜申號令明賞罰修道路嚴把截彼此協力
早夜圖謀務收桑榆之績以贖東隅之愆毋得仍
前怠緩致悞軍機及節行督責去後臣竊計平番
關堡實大戎之咽喉而諸路之保障今若陷沒則
彼據其利而我當其阻萬一設備深堅將來為力
百倍撫剿皆不易施矣乃密授方略乘其不備嚴
督諸道並進已於四月初九日該兵備守巡該道
僉事陳乙叅政李義壯僉事張朝聘督同遊擊曹
克新署都指揮丁勇等統領官軍前進賊眾退保
巢穴克復平番奠酒關堡呈報前來隨又督令修
理城垣蓋立營房就彼控據險要訓練軍兵相機
撫剿間本月十三日據原任遊擊曹克新報稱番
蠻百餘在於河亮口劄營當有守備指揮耿柱督
軍把截入箐去訖本月十五日又據遊擊張和報

稱番蠻二百餘衆在於地名寨頭劄營當有原差家丁張么兒等與番對敵用火步槍箭重傷跌崖數多被番奮力搶拖去訖復追至小徐溪等處與番對敵軍舍韓欽張元斬獲首級一顆并小功及牌刀弓箭等因呈解首級前來行按察司紀驗明白發仰梟掛外續准兵部咨為番蠻出沒事又為緊急番情乞調兵調將刻期征剿以安邊鎮事該本部覆議題奉 欽依備咨前來俱經通行安綿兵備川西守巡等道叅遊杜欽等官各戴罪訓士練兵固守地方一面再行多差乖覺通把人等齎帖前去各番住所宣布 朝廷恩威殺伐利害姑示寬仁如果真正悔罪許令獻出首惡明寘法理原捨人畜歸還本主量從撫處如或執迷不悛負固猶故遵照前議及節行事宜刻期進剿以靖地方備行遵照據兵備僉事陳乙等呈稟節差通把人等徧到番寨招撫俱各執拗不服及據叅政李義杜宋宜各備將征剿事宜擬議呈報又行令各選練士卒精詳間諜事勢未便則持重以待時機會可乘則速發以趨利毋得彼此觀望失誤軍機去後今據前因除將解到斬獲首級二十三顆批

行按察司紀驗明白仍發為害去處梟掛并將首
惡番牌李保兒伯什楊伏受馮么兒發仰按察司
牢固監候審取供招被虜人口查給各親屬領回
寧家候事寧之日同前後獲功失事人負併

題外參照白草番牌李保兒伯什楊伏受有名逋
寇稔惡渠魁奸狡甚於鬼蜮貪暴同於虎狼號令
一施群醜無不信聽干戈所指老幼盡為虔劉馮
么兒逞刀劍之舌玩弄無忌懷蜂蠆之毒操縱自
如軍情被其透漏賊壘用為著龜節年虜衆劫財
俱逃誅戮今次殺官陷堡益肆兇殘罪惡貫盈神

人共憤即今律就俘繫番寨俱已震驚况關堡既
復威武用張宜乘破竹之勢以收蕩定之功但目
下草木蒙茸溪水泛漲又值炎暑方熾不免疫癘
流行且各番退保幽深奪據狹狹之穴依憑險阻
積構木石之防若非稍俟天時遽難盡掃巢穴除
行副總兵何卿等再行撫處仍訓練軍士固守城
堡遇有警報相機策應各番如果執迷不悛待秋
氣稍深即便分布兵馬諸道並進務期罪人俱得
醜類盡殲以靖地方另行奏報緣係征剿逆番事
理為此具本題 知

急缺將官疏

題為急缺叅遊官負乞就近舉用以濟邊務事據四川按察司整飭松潘兵備副使繆宗周呈准本司關催前來查得松潘東路遊擊將軍張和前任犯有贓私已該兩院叅奉 欽依提問人犯今該委官成都府推官任璜查盤庫藏查得張和監守盜松潘等處邊銀一十兩以上例該充軍罪名但查本犯見今統領遊兵應請委官更代以便提問等因又據威茂兵備副使胡鳳呈稱松潘南路右叅將杜欽於本年八月初三日病故看得地方事

缺官乞委官代行叅將事務等因各該部咨四川都司掌印署都指揮僉事方策該本部題奉 欽依陞松潘南路遊擊將軍案查本官先因患病呈乞休致行該司勘議是實該臣具題請 旨去訖今據前因臣即會同巡按四川叅察御史袁鳳鳴看得各該叅遊官負守鎮番戎之巢穴用作四境之藩籬統馭一失變亂隨生誠不可易易而為者也即今逆寇未誅進兵在邇凡茲將領之司匪直干城之寄非智謀無以料敵非武勇無以先衆若取之於他方則未曾素履疆域

豈能洞見番情又或以新進未練選悞無為者充之則是掛虛名而無實用緩急將何賴焉臣等訪得原任松潘東路遊擊將軍曹克新年力精強熟諳戰陣才猷敏達志樹勲庸原任四川行都司掌印署都指揮僉事龔銳衝鋒陷陣威震西陲應敵臨危身先士卒原任貴州都司掌印署都指揮僉事宋璉沉幾有謀臨事知懼羌夷信服行伍歸心原任四川都司佐貳署都指揮僉事丁勇屢從征戰而膽略素優生長邊方而夷情備曉此數人者勇略不同皆可以統三軍之衆當一面之寄者也

內曹克新龔銳丁勇各被論劾罷職事多誣枉宋璉先因患病乞休今已痊愈伏望 皇上俯念地方正值多事將領尤貴得人 勅下兵部看詳將各官從宜推用庶幾統馭有方而逆寇可以早定保障不失而疆場得以少休矣為此具本謹題請 旨

留應 朝官員疏

題為乞留應 朝官員以安地方事據四川布政使司呈該本司左布政使嚴時泰會同按察司按察使紀常議照司府州縣例該本年冬月赴京應

朝節據本省成敘保馬等府潼瀘嘉定等州各申稱所屬州縣自去年八月不雨至於今年五月亢陽為災無水播種而所藝麥蕎俱無成實至五月終旬淫雨不止洪濤汎溢而新生豆粟通被漂流始則田疇龜拆曠野不毛繼以井竈陸沉室廬不保秋成無顆粒之望所在被魚鼈之殃耄倪待斃丁壯流離父老相傳以為自來蜀中災患未有如今日之甚者也雖蒙本院出示徧諭鄉村分投差官賑濟目下幸得少舒而將來重有可慮况白草逆番殺官陷堡征剽未寧而羅計都蠻劫財掠人警報頻至蓋成敘等郡介在大戎之間恒有豺狼之患平時不免為亂凶歲安保無虞其間調發兵餉防禦非常尤不可以易易而為者也又近該工部咨照題奉 欽依採取栢木俱該前項府州分派所屬買辦非得正官管理必致幹濟不前除重慶順慶等府眉雅等州所屬州縣事勢稍緩者仍令掌印首領官吏依期應 朝外所據各該災重有事地方全設府州縣掌印正官應合存留幹理為此開坐具呈乞為會 題施行等因到臣卷查先准吏部咨照得嘉靖二十六年正月初一日天

下諸司官負例該朝 覲備咨前來已經通行遵
依去後今據前因臣即會同巡按四川監察御史
袁鳳鳴議照三年朝 覲乃國家之著令臣子之
同情胥宜恪遵豈敢輕議但今各該地方師旅饑
饉因於一時疾疫死亡殆無虛日凡公私役用雖
經力為省節而輸輓防禦不免重擾居民前此旱
熯方張諸穀槁死畜牧無可就之草糞殮無可汲
之泉弱者皇皇待哺黠者洶洶思亂乃督責各掌
印官如成都府知府馬九德潼川州知州楊謨等
徧歷鄉村審報飢口隨宜賑恤人心始定計至冬
春之交尤須大為拯濟重以逆番之征未已採木
之役方興非正官不足以集事非本管不足以責
成又况蜀道險遠官員多缺若使隨例應 朝將
來束手無策殃民憤事之咎誰其任之如蒙
皇上宣昭遠略軫念民艱將各該有事地方官員
例該應 朝者暫留辦事姑容以次佐貳官員其
缺少佐貳者准令首領該吏齎冊應 朝庶幾彼
此各任其責而安攘咸有所賴矣為此具本謹題
請 旨

災傷疏

題爲地方災傷事據四川布按二司守巡川西川
北上下川南等道左叅政李義壯僉事張朝聘等
各呈報行據委官成都保寧順慶等府漢州嘉定
潼川等州資縣安岳梓潼等縣知府同知通判知
州知縣等官馬九德王儀鳳汪鯨劉琮孫之謀等
各覈勘過所屬災傷開稱自去年八月至於今年
五月不雨天氣亢陽烈日如焚蕎麥既不成實草
木亦皆槁死所有秋禾多因無水治田不得栽插
或少有栽插旋復焦枯顆粒無望老幼呻吟又自
本年五月下旬以來淫雨連綿洪水沅漲粟豆俱
被滄沒房屋亦為漂蕩小民重困展轉流離地方
災患莫此為甚備將各災傷分數呈報前來及據
布政司呈稱該本司掌印左布政使嚴時泰會同
按察司按察使紀常都司署印按察司副使沈應
龍議照四川地方依山為畊石多土少一遇旱傷
絕無源泉灌溉先因亢旱經歷十月以致田疇龜
拆種種難措繼因淫雨決旬洪水橫流低窪者混
為江河高平者驟被衝射夏麥無收秋成失望若
不大加寬恤未免餓死流離今各該道勘過被災
分數是實應合議處卷查戶部題 准事例夏秋

災傷被災三分以下不免全災免七分九分者免
六分八分者免五分七分者免四分六分者免三
分五分者免二分四分者免一分止許於存留糧
內除豁不許一槩將起運之數混免乞要奏請
將前項被災去處於嘉靖二十五年分稅糧照依
分數依例減免以蘇民困等因呈詳到臣簿查先
據潼瀘簡綿合仁壽內江資縣資陽中江遂寧安
岳樂至慶符南溪等州縣各申稱先被旱傷及後
被水災十分重大等因臣俱批行委官勘議回報
又行該道覈實呈詳及行各該司會議去後今據
前因臣會同巡按四川監察御史袁鳳鳴議得四
川地方山嶺盤旋既少溪河之畜洩田土瘠薄又
無陂堰之積潴旱燠易於為災淫雨頓復成患即
今旱潦相仍百穀無望張口待哺十室九空各懷
溝壑之憂曾無室家之戀不惟無告之民餓莩相
望而不逞之輩剽掠將行其為目前之虞非細故
也臣等目擊時艱不遑寧處督令各該掌印官徧
歷鄉村宣誠撫諭審報丁口隨宜賑恤及寬恤刑
獄節省力役少甦就斃之衆以收渙散之心所有
蠲免稅糧及動支錢穀賑濟應合奏請查得四

川嘉靖二十五年分稅糧已奉 恩詔蠲免四分
今照被災州縣分數不同亦應遞減災重者合無
將本年應徵六分稅糧不分邊糧祿米存留糧米
際行蠲免災輕者止將存留稅糧照例扣免其應
該賑濟銀穀亦聽臣等酌量災傷重輕分別戶則
高下隨宜動支放賑以濟民艱伏望 皇上憫念
邊方兵役未已重遭災困 勅下該部再加詳議
速賜施行庶地方可保無虞而小民不致失所矣
臣等不勝待罪願望之至為此具本謹題請
旨

建昌馬糞疏

題為肆惡番夷越界殺死人命燒燬房屋綁虜人
口貽患地方事據四川按察司整飭行都司建昌
兵備兼分巡上川南道副使大寶呈嘉靖二十五
年十二月十三日據委官行都司都指揮丘魯呈
稱蒙委前去勘處馬糞番情遵依親詣德昌等處
住劄撫處間本月十二日據土官賢宗仁呈報各
番大肆出沒劫掠正康怕戀二村人畜不計其數
連日屯聚不散等因到職看得各番節因撫諭愈
肆猖獗事情緊急乞發兵進剿施行等因到道案

照先據行都司經歷司呈奉本都司劄付准本司
掌印都指揮田繼禮咨并據委官都指揮李繼武
呈據委官建昌鹽井會川等衛指揮施輔等各呈
稱查得卷內嘉靖十七年正月內馬攏各賊殺死
查外村民哈喇綁虜張伏男婦九名口據民人卜
小剛告官嘉靖十八年十月內據舍人撒相琴童
告被番賊搶去牛馬般運稻穀白布等物嘉靖十
九年十月內殺死村民仔俊搶去家財牛馬不計
據伊男哈丙告官本年十一月內又殺死馬換柳
村民哈波據阮刺告官又劫臥落迷與得甲撒三
村殺死火頭阿三等綁去男婦阿些等五名口嘉
靖二十年正月內抄搶舍人高羨高堂軍人曹文
般運家財不計又劫洪口立麻二村殺死土民甲
非等五名嘉靖二十一年正月殺死八政村民夜
混夜刀吟仔三命丙希村呵我呵只綁去男婦羊
哈郎亦羊阿子阿意抄搶村民陶猛果卜哀保等
水黃牛馬匹家財等物又抄搶哀松鐵等水牛馬
匹家財等物又抄劄彎羊村民人阮寬等綁虜去
男阿哀又劫得麻怨古二村燒燬民房燒死火頭
阿些等五命綁去男婦甲鐵等二十五名口般去

秋糧羸馬等物嘉靖二十二年四月殺死弄各村
良民波刀個波既廣哈們呵俄張才等五命又殺
死民人哀追波哈保阿六抄搶男婦五名口哈保
哈啣哈仔刀文阿只虜搶黃牛羸馬家財等物又
劫已束等村民房屋燒燬殺死借刺佐甲的波五
名綁去男婦玉兒迷等三名口般去秋糧牛馬家
財等項嘉靖二十三年正月又抄搶舍人撒偶撒
俄家下殺死弟撒安撒才佑庄民哈丙愛權哈刀
哈賽七命殺死哈令哈者二名綁搶去庄民呵里
等五名本年三月各寨果遮等殺死庄民哈

刺二命本年十二月又據火頭阿補乍撒告被燒
燬房屋砍傷波波愛綁去男婦五名口又殺死土
民聶庭等五名又殺死民人波愛搶去牛豬家財
不計嘉靖二十四年正月又據土舍火頭阿補乍
撒告被番賊你罵遮燒燬房屋搶去牛馬番賊西
加玉兒柏等燒劫古得村五戶殺死火頭阿三又
綁去土民阿寨阿你男婦三名口殺死土民阿那
等三名口閏正月據張阿斗告彼馬羅三尖等寨
番賊大罷罵從厄刺等殺死軍丁張元庄民哈先
刀立等六名殺傷土軍楊梅等三命綁虜軍丁奇

進伏張安等一十三名三月內又來密古得村劫去百姪查那等七戶綁去男婦因得阿白等五名口四月內又來賈尾村劫去火頭乍里豬家綁去男婦查聚等四名口劫殺落聚麻村火頭阿里等家五月內又被番賊粗卜等殺死做咱咱吽吽打鐵等一十七命燒屍火塘三處又被番賊三峇沙折撒大卜粗卜等劫殺波間開阿禮義等男婦二十命又劫去良民阿只等男婦十三名口殺死民人阿別吽咱約兒等十五命九月內又劫鹽查五村虜去阿奴女一口十一月內又劫已束力麻等村殺死火頭卜兒加等五名嘉靖二十五年三月內又劫飢樂村土民綽遮等綁去男婦阿崩等六名口節經土民阿補乍撒等具告并指揮李恩土官副千戶賢麒等申呈撫按衙門屢次批行該道委官勘處撫剿各番恃惡四處聚衆行兇劫殺人財隨撫隨叛若不早行剿滅未免攘成大患必須用兵掃除庶免萌牙再發三衛軍民得安等因到道批仰行都司都指揮田繼禮覆議得前項番賊應該調選土兵乘時剿滅及領兵漢土官負分哨夾攻各緣由前來看得名官所議前項番賊屢犯

不悛節撫未息人財每被劫殺受害日深地方半
為傷殘除兇已晚若欲再行撫處誠恐不改初心
養寇殃民貽禍無窮即今以順討逆兵出有名事
非得已合無俯念邊陲早為批示撲滅非惟一方
軍民幸甚而本道諸司亦幸甚等因具由通行呈
詳奉巡撫四川右副都御史張 批番寇劫掠地
方罪惡貫盈神人共憤誠宜誅剿以安生民但用
兵大事不嫌慎重目下方征白草尚未刻期而又
議征馬羅恐犯不戢之戒况丘魯未到其餘將領
恐未有以分該道之責者且姑行撫處不服而征
之則成策具在一舉可以集事而不逞之徒求其
生而不得則死者與我可以無憾矣倘有警報再
呈定奪此繳又蒙巡按四川監察御史袁鳳鳴批
據詳真料敵制勝之謀一勞永逸之計且及今圖
之尚易為力他日夷寇機深惡稔未必不墮其計
而勦誅拔本責效或難仍就區處之中再加慎重
之意候巡撫衙門均允施行此繳本道遵依撫處
間節據解戶陳玳等告稱行至雙橋堡地方被西
番上道搶去糧銀一千七百餘兩及經行客商累
被劫殺情由又該本道議得馬羅為害地方非一

年軍民被其劫掠非一人撫按衙門行議撫剿非
一日雖節經撫處而夷心狡猾累惡不悛即今馬
羅遺種生長日蕃三衛軍民受害日甚欲拯生靈
之陷溺勢當必征蓋因亂討亂非敢貪功以夷攻
夷實利禦寇且十月以來煙瘴漸消各寨番夷仍
復下山劫掠迷易千戶所一帶地方不勝殘虐側
足延頸望切雲霓再照馬羅與白草番蠻均為西
南之夷種類不殊聲勢相倚即今題奉 明旨征
剿白草逆番大軍啓行成功可必誠宜乘此機會
速將馬羅早行征剿使其各自受敵不暇應援機
當早圖時難再得及稱丘魯今已回任寧越守備
指揮蕭恩可以副之知縣徐瀾易鰲等俱堪委用
等因具由通呈奉巡撫四川右副都御史張 批
馬羅西番既不聽撫處見行劫掠依擬整搦兵衆
嚴加防禦俟其出劫合兵剿捕仍行丘魯蕭恩等
該道調度各任其責其餘事宜俱依先令等因是
行此繳又蒙巡按四川監察袁御史批詳稱馬羅
當剿事在不疑且有丘魯可任寄宜專委知縣徐
瀾易鰲亦聽委用但兵機大事尤須萬全在撫院
有地方之責當候允行如見有異同另行呈奪此

繳蒙此本道於十二月十二日前到建昌案行丘
魯蕭恩易鰲徐瀾等官并行都司建前會鹽四衛
各掌印指揮千百戶等官施輔等遵奉撫按德威
再行撫處間又據都指揮田繼禮稟稱馬羅番賊
自十月以來縱出甸沙巴松白水等處地方劫殺
人財不計其數行旅不通比前愈肆委的十分緊
急今據所呈看得馬羅之罪貫已盈居民之受害
日甚若不調兵防禦相機撫剿不惟死者無以復
讐而生者不得存息村落傷殘槩為虎狼之窟穴
道途梗塞難通糧餉之往來職等待罪地方負責
非小理合呈乞施行等因到臣案照節據該道
呈馬羅為逆應該撫剿事宜前來備行多方防禦
去後今據前因該臣會同巡按四川監察御史袁
鳳鳴議照前項馬羅番賊節行寇害大肆兇殘屢
經撫處叛亂隨生今又復行出劫殺虜軍民罪惡
貫盈神人共憤况賊勢猖獗非空言可以鎮定而
事情緊急恐延緩必至滋蔓萬一地方失守將來
救援實難除一面備行建昌兵備副使朱簾并都
指揮等官丘魯等量選漢土軍兵分路防禦仍多
方撫處務將為惡渠魁責令逐一擒斬明正國

法以靖地方如負固不服肆行劫殺就便相機剿捕殄滅妖氛通候事寧之日分別功過另行奏報緣係肆惡番夷越界殺死人命燒燬房屋綁虜人口貽患地方事理未敢擅便為此具本題 知

改革驛站疏

題為咨利弊以便興革事據四川布政使司呈該臣批據四川按察司整飭敘瀘兵備僉事劉世用呈該臣案馳據按察司副使沈應龍并敘州府知府陳天資推官張一鶴瀘州知州許士德各條稱水路月波宣化真溪牛口下水止半日之程上水

止二日之程中設四水驛似為太多又宜賓溪下水止半日上水止一日中有李莊驛亦為太密其廩糧過關夫船俱屬糜費以早程言之宜賓二百二十里至犍為又一百六十里至富順未曾設有館驛里甲夫馬勞費太甚合將牛口真溪二驛併入宣化為水馬驛踏勘適中處所移牛口真溪一驛居之李莊改設於宜富交界觀音鋪為馬驛則水陸各得其宜又瀘州至富順一百四十里路程崎嶇寫遠夫馬走遞甚難納谿上至渠壩水驛二十里渠壩至大洲水驛三十里大洲至峽口

水驛三十里峽口至江門水驛三十里緣渠壩峽口二處相離不遠往來人負多不止宿亦為虛設其旱程遞送夫馬自納谿直至江門走遞百十餘里方終倒換殊為偏累合將峽口驛裁革將該驛船隻人夫歸併於大洲驛改為水馬驛及將渠壩驛改於懷德鎮為馬驛以便遞送案行本道查議回報依奉會同守巡道并該府州縣各掌印官履勘得宣化水驛議改為馬驛觀音鋪懷德鎮各原無驛今議各創建一驛捷為宜賓陸程相距二十里宣化間於其中宜賓富順陸程相距二十里宣化觀音鋪間於其中富順瀘州陸程相距一百四十里懷德鎮間於其中大約三驛每驛該議定上馬各四匹中馬各八匹下馬各一十二匹總計該糧一萬五千六百石再查月波至真溪真溪至汶川汶川至南溪各止八十里而納谿至大洲亦纔五十里彼牛口在真溪汶川之中李莊在汶川南溪之中渠壩在納谿大洲之中誠為太密相應裁革納谿至大洲大洲至江門水陸之程各適均江門為水馬驛大洲水驛亦更為水馬驛而峽口參於江門大洲之間亦為太密故峽口宜歸併

於大洲今將峽口水夫糧石歸併於大洲計二驛
糧石通有三千九百石仍該編站船三隻人夫三
十九名水程走通用糧一千九百五十石又該編
上馬二匹中馬一匹下馬七匹陸程走通用糧二
千一百二十五石二項共糧四千七十五石尚欠
一百七十五石却於江門水馬驛原編糧四千二
百五十石內撥取一百七十五石湊補則江門水
馬驛已取站船三隻人夫三十九名上馬二匹中
馬一匹下馬七匹大洲水馬驛亦得站船三隻人
夫三十九名上馬二匹中馬一匹下馬七匹水陸

通融自足應用其宣化該改水夫糧四千五百五
十石牛口李莊渠壩該革水夫糧牛口李莊各四
千五百五十石渠壩一千九百五十石共計糧一
萬五千六百石通融分編宣化觀音鋪懷德鎮三
驛各上馬四匹共一十二匹分去糧三千石各中
馬八匹共二十四匹分去糧五千四百石各下馬
一十二匹共三十六匹分去糧七千二百石實用
盡前糧萬五千六百石其修理之費宣化則因
舊整新取足於牛口之廢材大洲則併二為一不
變乎往時之隘陋觀音鋪有近鋪佛寺可以更改

懷德鎮有舊建公館略加恢弘李莊渠壩遺料尚存就近般移亦無勞費裁革驛丞則牛口李莊渠壩峽口四負新添驛丞則觀音懷德二負其渠壩既移懷德鎮似宜即以懷德為驛名李莊既移觀音鋪似宜以通濟為驛名等因奉批據呈議處已悉但事係改革仰布政司會同都按二司覆議呈詳奉此又蒙巡按四川監察袁御史批裁冗置以濟衝繁誠蘇困節勞勢不容已且哀多益寡為力不難既經會勘已週相應議處但事干設官請印布政司仍會都按二司再行備查明白通詳蒙

此該本司掌印右布政使王崇慶會同四川按司掌印副使沈應龍都司署都指揮僉事徐昂覆議得僉事劉世用呈稱前項改革驛傳係本官所轄往來巡歷目擊必真况稽之衆論僉同求之民情允協各職查議誠為穩便合無俯從前議會題施行等因到臣該臣會同巡按四川監察御史袁鳳鳴議照川蜀道路漸次開通今昔經行遷改不一况規制或遺於始創而興革有待於將來如前項驛傳有路當衝要應該添設者有原設重密應該裁改者况川江險阻人鮮經行則多設水驛

誠為無用其陸路四季遞送往來不絕兼之程途
寫遠動經信宿使各縣夫馬裹餼糧而遠馳棄耕
作以應役誠宜添設馬驛以疎民困今該本府州
縣掌印官之酌議又該三司各道官之勘詳民清
輿論俱已相安因時制宜移彼就此財力不至於
妄費而疲民庶得以息肩委應俯從以利久遠如
蒙 皇上俞允 勅下兵部覆議相應將李莊牛
口渠壩峽口四驛裁革各驛驛丞起送改選宣化
水驛改為馬驛大洲水驛改為水馬驛二驛驛丞
照舊管事印記降換其二驛舊降水驛印記

各 奏繳其新創懷德鎮觀音鋪二馬驛 請定
驛名或如各道所擬一為懷德驛一為通濟驛
官降印驛官俸糧於該府州存留倉支給驛吏各
一名行布政司查撥各驛船馬夫糧并修理之費
俱照該道前議施行實為良便為此會本謹題請
旨

添設保寧廣元二遞運所疏

題為乞建遞運以懷遠貢以節民力事據四川布
政使臣該臣批據四川按察司提督水利兼理驛

傳僉事李實呈該前巡撫四川右僉都御史丘
批行該道行據該府呈准知府謝上箴議照閬中
縣設在附郭民止十鄉道通京省雲貴諸邊遠貢
五路衝要往來經過官員公使人役絡繹不絕先
因見年里甲夫馬不敷遞送以合縣十甲丁糧編
派月夫責付排年管束差撥相兼扛臺遂為定規
常年拘繫妨悞農業委的疲困不堪以致知縣畢
汝勤陳乞添設遞運所衙門勢當舉行又該本道
會同守巡川北道覆議相同呈詳前巡撫四川右
副都御史王 批看得閬中係附郡之邑地劇甚

貧里分亦少添設遞運夫差各有統屬專設不致
妨農且免官吏科擾之害良為有見但恐丁糧民
力猶有弗堪仰會守巡道再議呈奪奉此依奉行
據該府呈准知府南逢吉查議得本府委應添設
遞運所緣由到道會同守巡川北道右叅政宋宜
僉事張朝聘查議得該縣委果地劇民貧差役繁
重排年常川應役則百姓終無休息妨廢農業莫
此為甚其創建遞運衙門編給協濟夫銀雇募庶
為官民兩便等因奉批布政司會議呈詳定奪奉
此又奉本院批據本司議呈廣元縣添設遞運所

緣由奉批設遞事宜再會議歸一通呈施行此繳
奉此案照先蒙巡按四川監察御史朱徵批該本
司分守川北道左叅政李義壯呈蒙本院批據廣
元縣儒學生負何遵約等呈稱廣安縣夫阜上送
至寧羌州下送至蒼溪縣路遠差累合無比照寧
羌州城外添設遞運所該本道審看委屬相應等
因蒙批廣元以三鄉極憊之民而當三省絕衝之
地加遞事在燃眉布政司候新撫院至日具由通
呈以憑會處方繳蒙此看得左叅政李義壯呈要
設立遞運所事宜行准各司道重覆查勘委的

久可行已經呈詳去後今奉前因該本司掌印
布政使王崇慶會同四川按察司掌印副使沈應
龍都司署都指揮僉事徐昂覆議得各道呈稱創
建保寧廣元各遞運所誠為便民蘇困至計委與
各職查議相同無容再議合無俯從會題於該
府縣各設一遞運所銓官降印則夫有統屬差有
專役小民既得免於妨農而使客亦不至於耽悞
等因到臣案照先該臣等查得二縣路當衝要用
夫數多接遞繁難誠為偏累議於閩中廣元二縣
各編扛夫一百四十名徵銀解保寧府支給雇募

應遞委官支銷去後今據前因該臣會同巡按四
川監察御史袁鳳鳴議照閬中廣元水陸路道極
係衝繁况編戶鮮少差使殆無虛日地土瘠薄應
辦委難支吾飢饉頻仍逃亡相繼若不及時拯濟
將來困弊益深近該臣等編發前項夫銀雇募少
紓民力但無專官經管未免日久弊生雖救目前
之急終非永久之規今據三司各道重復勘議俱
稱當設遞運所以便接遞似應俯從如蒙 皇上
憫念邊方軍民困苦 勅下兵部覆議如果相應
將該府縣添設保寧廣元二遞運所衙門請

名銓官降印其衙門公廨行守巡官估計動支官
錢責委的當人負修理所官俸糧於該府縣存留
倉內支給合用所吏各一名行布政司查撥并其
餘事宜委照前議施行為此會本謹題請 旨



